

HARI MINGGU BIASA KE-18 (C)

Pengkotbah/Qoheleth 1:2; 2:21-23; Mazmur 89 (90):3-6. 12-14. 17. R/ v. 1; Kolose 3:1-5. 9-11
Lukas 12:13-21

Tema: WANG TIDAK DAPAT MEMBELI KEHIDUPAN, CINTA KASIH DAN KEBAHAGIAAN

1. Hari ini adalah hari Minggu ke-18, Tahun Liturgi C. Bacaan-bacaan hari ini memberitahu kita bahawa wang tidak dapat memberi kehidupan, cinta kasih dan kebahagiaan. Kehidupan, cinta kasih dan kebahagiaan adalah tiga perkara yang penting! Ia ditemui di syurga! Dan Allah memberinya kepada kita melalui kematian dan kebangkitan Putera-Nya dan pencurahan Roh Kudus! Carilah kerajaan-Nya, maka semuanya itu akan ditambahkan juga kepadamu! Iaitu, cari dahulu penyelamatan dan segala ciptaan akan ditambah kepadamu!

Injil hari ini memberitahu kita bahawa seorang dari orang ramai telah bertanya kepada Yesus supaya memberitahu kepada saudaranya untuk membahagikan warisan bagiannya, tetapi Yesus tidak bertindak balas kepada permintaannya. Bahkan Yesus memberitahunya sesuatu perkara yang penting, iaitu, kehidupan bukan datang dari kekayaan, walaupun kita mempunyainya lebih dari keperluan kita! Kemudian Yesus memberitahunya tentang “perumpamaan orang kaya yang bodoh”.

Ada seorang kaya, tanahnya banyak berlimpah-limpah hasilnya. Tanahnya banyak berlimpah-limpah hasilnya sehingga dia terpaksa membina sebuah gudang yang lebih besar untuk menyimpan hasil tuaiannya! Kemudian dia berfikir dalam dirinya bahawa hasil tuaiannya itu sudah dapat menanggung sepanjang kehidupannya, dan dia bercadang akan hidup dengan senang, makan dan minum dan bersenang-lenang; tetapi pada malam itu Allah telah mengambil nyawanya, iaitu, dia mati!

Kita tidak mungkin mati secara fizikal, tetapi kita mungkin mati secara kerohanian, iaitu, jiwa kita mungkin mati disebabkan oleh dosa dan ia tidak mempunyai kehidupan, cinta kasih dan kebahagiaan dalam jiwa kita. Seperti “orang kaya bodoh” itu kita tidak dapat menikmati kekayaan tuaian kita, iaitu, walaupun kita kaya tetapi kita tidak mempunyai kehidupan, cinta kasih dan kebahagiaan!

Itulah sebabnya “Pengantar Injil” memberitahu kita:

“Berbahagianlah yang hidup miskin terdorong oleh Roh Kudus, sebab milik merekalah kerajaan Allah..” (Mat 5:3; SM)

Mereka yang miskin dalam roh bukanlah yang hanya miskin material atau miskin kerohanian, tetapi mereka yang miskin dalam roh adalah mereka yang bergantung kepada Allah dan Allah akan memberkati mereka dengan kehidupan, cinta kasih dan kebahagiaan-Nya dari surga!

2. Bacaan pertama menurut tema Injil, tetapi bacaan pertama bukanlah kabar gembira, tetapi kabar yang tidak gembira! Bacaan pertama memberitahu kita bahawa tanpa Allah hidup kita adalah sia-sia, kosong dan tanpa erti! “Kesia-siaan belaka”! Kita bekerja keras siang dan malam dari tahun ke tahun hanya untuk mati dan meninggalkan harta milik kita kepada orang lain yang tidak perlu bekerja untuk mendapatkannya. Dan yang lebih teruk lagi, segala harta milik kita itu diboroskan dalam satu generasi oleh mereka yang tidak bekerja untuknya! (Qo 2:18-19) “Kesia-siaan belaka”! Tanpa Allah semuanya sia-sia, kosong dan tiada erti!

3. Mazmur antarbacaan menurut tema hari Minggu. Mazmur antarbacaan memberitahu kita bahawa kehidupan dan kematian, dan cinta kasih dan kebahagiaan datang dari Allah, Itulah sebabnya mengapa kita harus berdoa kebijaksanaan untuk hidup dalam kehidupan cinta kasih dan kebahagiaan!

Mazmur antarbacaan mempunyai empat rangkap. Rangkap pertama dan kedua (ayat 3-6) memberitahu kita bahawa kehidupan dan kematian datang dari Allah! Rangkap ketiga dan keempat (ayat 12-14, 17) memberitahu kita supaya berdoa untuk kebijaksanaan hidup, kehidupan, cinta kasih

dan kebahagiaan! Rangkap keempat (ayat 17) juga memberitahu kita supaya berdoa kepada Allah untuk berkat-Nya agar karya tangan kita dapat berhasil! Dengan itu sahutannya:

“Ya Tuhan, Engkaulah pelindung kami turun temurun.” (Mzm 89 (90):1; SM)

4. Secara kebetulan pula, bacaan kedua juga menuruti tema hari Minggu. Bacaan kedua mempunyai dua rangkap. Rangkap pertama (ayat 1-4) memberitahu kita untuk melihat kepada perkara-perkara surgawi agar kita menemui kehidupan (NJB), cinta kasih dan kebahagiaan!

Rangkap kedua (ayat 5, 9-11) memberitahu kita jangan melihat kepada perkara-perkara duniawi, sebab perkara duniawi kemungkinan menggoda kita kepada dosa dan dosa membawa kematian dan dalam kematian tiada cinta kasih dan kebahagiaan!

5. Hari ini kita bersyukur kepada Allah atas segala ciptaan dan kita mohon kepada Allah untuk memberi kita Roh Kudus kehidupan, cinta kasih dan kebahagiaan-Nya! Sekali lagi, carilah kerajaan-Nya, maka semuanya itu akan ditambahkan juga kepadamu. (Luk 12:31; Mat 6:33) Iaitu, carilah dulu penyelamatan dan segala penciptaan akan diberikan juga kepadamu! Tuhan memberkati kamu!

Amen!

Soalan-soalan cadangan untuk renungan individu dan perkongsian dalam keluarga dan kumpulan kecil dan dalam komuniti-komuniti kecil:

1. Bolehkah wang membeli kehidupan, cinta kasih dan kebahagiaan?
2. Apakah kamu miskin dalam roh? Apakah kamu bergantung sepenuhnya kepada Allah?
3. Adakah kamu kaya? Adakah kamu miskin? Apakah kamu bahagia?
4. Apakah kamu mati secara kerohanian? Adakah kamu hidup secara rohanian?
5. Adakah kehidupan kamu sia-sia, kosong dan tanpa erti? Apakah kehidupan kamu bererti dan bercita-cita? Apakah Allah mempunyai tempat dalam kehidupan kamu?
6. Adakah kamu mencari perkara-perkara yang di surga? Apakah perkara-perkara yang kamu temui di surga?
7. Apakah kamu mencari perkara-perkara yang ada di bumi? Adakah perkara-perkara di bumi menggoda kamu berdosa?

Fr. Nicholas Ong, Holy Trinity Catholic Church (HTCC), Tawau, Sabah, Malaysia,

Rujukan: New Jerusalem Bible (NJB); Sunday Missal (SM).